

書

校補竹書紀年

古墨齋藏板

校補竹書紀年叙



紀年一書晉武帝太康二年始出汲郡魏襄王家中蓋戰國時魏史紀事之書也魏襄王薨于紀年書竣之後故書得藏冢中東晉傳又謂或言得之安釐王家杜預左傳後序又云得之于哀王恐皆非事實此書雖迭經元明以來增益竄改然大略尚汲冢之舊非盡出于依託也其紀事皆倣春秋如夏帝癸十年書夜中星隕如雨書敗曰敗績書歲稔曰大有年皆春秋之法也紀年于春秋經傳及國語國策史記等書亦殊有裨益今攷春秋經僖公七年八年皆書夏狄伐晉而紀年獨于周惠王末年即僖公七年書春

狄人伐晉疑春秋七年夏字以八年而誤也是紀年可以
證經矣又紀年于周釐王四年書晉猶不與齊桓公之盟
今攷此年之先經傳書諸侯會于鄆莊十年又書同盟于幽
莊十年正釐王三年四年內事獨不及晉侯是猶不與齊桓
盟之證也是紀年又可證傳矣左傳隱公五年秋王命虢
公伐曲沃而立哀侯于翼杜預注翼侯奔隨故立其子光
又六年傳鄂侯下注前年桓王立此侯之子于翼故不得
復居翼別居鄂紀年則云平王四十七年晉曲沃莊伯入
翼弑孝侯晉人逐之立孝侯子郤是爲鄂侯今攷事尚在
隱公即位前二年杜注安得云晉不告亂故不書乎又以

史記世家合之紀年皆云鄂侯卒始立其子哀侯杜又不
當云不得復入翼故別居鄂也紀年之瑕父呂甥即左傳
之瑕呂飴甥也呂甥先食采于瑕故稱曰瑕父郡國志河
東郡解有瑕城是也後又食采于呂故又稱瑕呂劉昭引
張華博物志河東永安縣有呂鄉呂甥邑是也杜注安得
云姓瑕呂名飴甥乎是紀年又可以糾杜注之失矣晉語
驪姬賂二五使言于公曰蒲與二屈君之疆也韋昭注二
屈屈有南北今河東有北屈則是時復有南屈應邵注漢
書亦云有南故稱北而皆不言南屈所在惟紀年于周隱
王七年書翟章救鄭次于南屈是南屈近鄭之地當在今

河陝間又可以補國語傳注之缺矣戰國韓策或謂鄭王曰申不害之計事曰夫弱魏之兵而重韓之權莫如朝魏昭釐侯聽而行之然下不著朝魏之事也紀年則于周顯王十五年書鄭釐侯來朝中陽正在申不害計事之後是紀年又可補國策之簡略矣史記晉世家謂獻公八年晉始都絳而紀年則于周惠王九年始書晉城絳惠王九年亦即晉獻公之九年也是則城絳都絳皆在九年與詩譜水經注等合不得云八年也是又可以救史記之失矣至於以熒澤爲洞澤長子爲尚子周赧王爲隱王齊田盼爲田盼皆同聲之字又可知此書之尚有古音古字矣他若

以高粱爲南梁以狐毛爲狐尾則以字之近而誤也余嘗竊怪杜預曾見此書而注左傳乃故相違戾若此則平吳之後功業既崇不復能悉心研究故也至沈約附注惟好言符瑞亦無甚發明今趙君生于千餘年之後廣搜博采爲校補二卷乃能歷引史記漢書山海經水經注宋書符瑞志史記正義索隱等以補其未備其有益于紀年者不少矣夫沈約本爲此書附注今悉錄符瑞志等以補之是也若宋羅泌所撰路史半多臆造是以考據家不欲引之今亦採其說以證紀年則千慮之一失矣余以撰此間縣志與君共事最久見君之好古若渴也頗行又出此書乞

爲之叙用不辭而詳其原委如左云陽湖洪亮吉叙

竹書原委

晉書武帝紀咸寧五年汲郡人不準掘魏襄王家得竹簡小篆古書十餘萬言藏于秘府

晉書束皙傳初太康二年汲郡人不準盜發魏襄王墓或言安釐王家得竹書數十車其紀年十三篇記夏以來至周幽王爲犬戎所滅以事接之三家分仍述魏事至安釐王之二十年蓋魏國之史書大略與春秋皆多相應其中經傳大異則云夏年多殷益于啓位啓殺之太甲殺伊尹文丁殺季歷自周受命至穆王百年非穆王壽百歲也幽王既亡有共伯和者攝行天子事非二相共和也其易經

二篇與周易上下經同易繇陰陽卦二篇與周易略同繇辭則異卦下易經一篇似說卦而異公孫段二篇公孫段與邵陟論易國語三篇言楚晉事名三篇似禮記又似爾雅論語師春一篇書左傳諸卜筮師春似是造書者姓名也瑣語十一篇諸國卜夢妖怪相書也梁邱藏一篇先叙魏之世數次言邱藏金玉事繳書二篇論弋射法生封一篇帝王所封大歷二篇鄒子談天類也穆天子傳五篇言周穆王游行四海見帝臺西王母圖詩一篇畫贊之屬也又雜書十九篇周食田法周書論楚事周穆王美人盛姬死事大凡七十五篇七篇簡書折壞不識名題冢中又得

銅劍一枚長二尺五寸漆書皆科斗字初發冢者燒策照取寶物及官收之多燼簡斷札文既殘缺不復詮次武帝以其書付祕書校綴次第尋考指歸而以今文寫之誓在著作得觀竹書隨疑分釋皆有義證

王隱晉書束皙傳太康元年汲郡得竹書漆字科斗之文大凡七十五卷晉書有其目錄其六十八卷皆有名題其七卷折簡碎雜不可名題有周易上下經二卷紀年十二卷璣語十一卷周王遊行五卷說穆王遊行天下之事今謂之穆天子傳此四部差爲整頓詔荀勗和嶠以隸字寫之

晉書荀勗傳得汲冢中古文竹書詔勗撰次之以爲中經列在秘書

荀勗曰和嶠云紀年起自黃帝終於魏之今王今王魏惠成王子案太史公書惠成王但言惠王惠王子曰襄王襄王子曰哀王惠王三十六年卒襄王立十六年卒并惠襄爲五十二年今按古文惠成王立三十六年改元稱一年改元後十七年卒太史公書爲誤分惠成之世以爲二王之年數也世本惠王生襄王而無哀王然則今王者魏襄王也

晉書衛恒傳亦云太康元年汲縣人得策書數十餘萬言案敬侯所書猶有髣髴古書亦有數種其一卷論楚事者最爲工妙

晉書王接傳時秘書丞衛恒考正汲冢書未訖而遭難佐著作郎束皙述而成之事多證異義時東萊太守陳留王庭堅難之亦有証據皙又釋難而庭堅已亡散騎侍郎潘滔謂接曰卿才學理議足解二子之紛可試論之接遂詳其得失摯虞謝衡皆博物多聞咸以爲允當

杜預左傳後序太康元年三月吳寇始平予自江陵還襄陽解甲休兵乃申舒舊意修成春秋釋例及經傳集解始訖會汲郡汲縣有發其界內舊冢者大得古書皆簡編科

斗文字發冢者不以爲意徃徃散亂科斗書久廢推尋不能盡通始者藏在秘府余晚得見之所記大凡七十五卷多雜碎恠妄不可訓知周易及紀年最爲分了周易上下篇與今正同別有陰陽說而無彖象文言繫辭疑於時仲尼造之於魯尚未播之於遠國也其紀年篇起自夏殷周皆三代王事無諸國別惟特記晉國起自殤叔次文侯昭侯以至曲沃莊伯莊伯之十一年十一月魯隱公之元年正月也皆用夏正建寅之月爲歲首編年相次晉國滅獨記魏事下至魏哀王之二十年蓋魏國之史記也推校哀王二十年太歲在壬戌是周赧王之十六年秦昭王之八

年韓襄王之十三年趙武靈王之二十七年楚懷王之三十年燕昭王之十三年齊湣王之二十五年也上去孔邛卒百八十一歲下去今太康三年五百八十一歲哀王於史記襄王之子惠王之孫也惠王三十六年卒而襄王立立十六年卒而哀王立古書紀年篇惠王三十六年改元從一年始至十六年而稱惠成王卒即惠王也疑史記誤分惠成之世以爲後王年也哀王二十三年乃卒故特不稱謚謂之今王其著書文意大似春秋經推此足見古者國史策書之常也文稱魯隱公及邾莊公盟于姑蔑即春秋所書邾儀父未王命故不書爵曰儀父貴之也又稱晉

獻公會虞師伐虢滅下陽即春秋所書虞師晉師滅下陽
先書虞賄故也又稱周襄王會諸侯于河陽即春秋所書
天王狩於河陽以臣召君不可以訓也諸若此輩甚多畧
舉數條以明國史皆承告據實而書時事仲尼脩春秋以
義而制異文也又稱衛靈公及赤翟戰于洞澤疑洞當爲
洞即左傳所謂熒澤也齊國佐來獻玉磬紀公之甌即左
傳所謂賓嬭人也諸所記多與左傳符同異於公羊穀梁
知此二書近世穿鑿非春秋本意審矣雖不皆與史記尚
書同然叅而求之可以端正學者又別有一卷純集疏左
氏傳卜筮事上下次第及其文義皆與左傳同名曰師春

師春似是抄集者人名也紀年又稱殷仲壬即位居亳其
卿士伊尹仲壬崩伊尹放太甲於桐乃自立也伊尹即位
放太甲七年太甲潛出自桐殺伊尹乃立其子伊陟伊奮
命復其父之田宅而中分之左氏傳伊尹放太甲而相之
卒無怨色然則太甲雖見放還殺伊尹而猶以其子爲相
也此爲大與尚書叙說太甲事乖異不知老叟之伏生或
致昏忘將此古書亦當時雜記未足以取審也爲其麤有
益於左氏故畧記之附集解之末焉

荀勗穆天子傳序云太康二年汲縣民不准恣發古冢得
書皆竹簡素絲編以臣勗前所考定古尺度其簡長二尺

四寸以墨書一簡四十字汲在戰國時魏地也案所得紀年蓋魏惠成王子今王之塚也於世本蓋襄王也案史記六國年表自今王二十一年至秦始皇三十四年燔書之歲八十六年及至太康二年得此書凡五百七十九年郭璞山海經序案汲郡竹書及穆天子傳穆王西征見西王母執璧帛之好獻綿組之屬穆王享王母於瑤池之上賦詩往來辭義可觀遂襲崑崙之邱游軒轅之宮眺鍾山之嶺玩帝者之寶勒石王母之山紀跡元圃之上乃取其嘉木艷草竒鳥恠獸玉石玫瑰之器金膏燭銀之寶歸而殖養之於中國穆王駕八駿之乘右服盜驪左騶騶耳造

父爲御犇戎爲右萬里長驚以周歷四荒凡名山大川靡不登濟東升大人之堂西燕王母之廬南轢鼇鼉之梁北躡積羽之衢窮歡極娛然後旋歸案史記說穆王得盜驪騶耳驪騶之驥使造父御之以西巡狩見西王母樂而忘歸亦與竹書同左傳曰穆王欲肆其心使天下皆有車轍馬跡焉竹書所載則是其事也而譙周之徒足爲通識瑰儒而雅不平此驗之史考以著其妄司馬遷叙大宛傳亦云自張騫使大夏之後窮河源惡覩所謂崑崙者至於本紀山海經所有恠物余不敢言也不亦悲乎若竹書不潛出於千載以作徵於今日者則山海之言其幾乎廢矣

隋經籍志晉太康元年汲郡人發魏襄王家得古竹簡書字皆科斗帝命中書監荀勗令和嶠撰次爲十五部八十七卷

隋志紀年十二卷

汲冢書并竹書同異一卷

唐志紀年十四卷

汲冢書 新舊書同

宋藝文志竹書三卷

荀勗和嶠編

欽定四庫全書簡明目錄竹書紀年二卷

是書稱魏之史記由汲郡人發

冢而得晉書具載其事沈約作註隋志亦載其名然證以諸書所引與今本多不相符注文亦多勦取宋書符瑞志蓋又依託之僞本以流傳已久存之耳

竹書紀年卷一

涇川趙紹祖校補

男國楨校字

黃帝軒轅氏

母曰附寶見大電光繞北斗樞星照郊野感而孕二十五月而生帝於壽邱弱而能言龍顏有聖德劾百神朝而使之應龍攻蚩尤戰虎豹熊羆四獸之力以女魃止淫雨天下既定聖德光被羣瑞畢臻有屈軼之草生於庭佞人入朝則草指之是以佞人不敢進

按母曰附寶以下皆宋書符瑞志之文恐是輯竹書

者取以附會休文而註之耳然相傳已久不欲刪去
姑仍之而校正其譌字

元年帝即位居有熊○初制冕服

二十年景雲見以雲紀官

有景雲之瑞赤方氣與青方氣相連赤方中有兩星青
方中有一星凡三星有黃色以天清明時見於攝提名
曰景星帝黃服齋于中宮坐于元扈洛水之上有鳳凰
集不食生蟲不履生草或止帝之東園或巢於阿閣或
鳴於庭其雄自歌其雌自舞麒麟在囿神鳥來儀有大
螻如羊大蠙如虹帝以土氣勝遂以土德王

按有景雲之瑞以下皆宋書符瑞志之文

五十年秋七月庚申鳳鳥至帝祭于洛水

庚申天霧三日三夜晝昏帝問天老力牧容成曰於公
何如天老曰臣聞之國安其主好文則鳳凰居之國亂
其主好武則鳳凰去之今鳳凰翔於東郊而樂之其鳴
音中夷則與天相副以是觀之天有嚴教以賜帝帝勿
犯也乃召史卜之龜焦史曰臣不能占也其問之聖人
帝曰已問天老力牧容成矣史北面再拜曰龜不違聖
智故焦霧既降游于洛水之上見大魚殺五牲以醮之
天乃甚雨七日七夜魚流於海得圖書焉龍圖出河龜

書出洛赤文篆字以授軒轅接萬神於明庭今寒門谷口是也

按庚申以下皆宋書符瑞志之文

五十九年貫胸氏來賓○長股氏來賓

七十七年昌意降居若水產帝乾荒

一百年地裂○帝陟

帝王之崩皆曰陟書稱新陟王謂新崩也帝以土德王應地裂而陟葬羣臣有左徹者感思帝德取衣冠几杖而廟饗之諸侯大夫歲時朝焉

按羅泌路史黃帝紀下引汲書黃帝死七年其臣左

徹乃立顓頊與今本不同且路史不應引沈註以為

汲書疑此為竹書所本有而後人以意增損之也

約按帝摯少昊氏母曰女節見星如虹下流華渚既而

夢接意感生少昊登帝位有鳳凰之瑞或曰名清不居

帝位帥鳥師居西方以鳥紀官

按有鳳凰之瑞以上皆宋書符瑞志之文或曰名清

以下則符瑞志所無也

帝顓頊高陽氏

母曰女樞見瑤光之星貫月如虹感已於幽房之宮生

顓頊於若水首戴干戈有聖德生十年而佐少昊氏二

十而登帝位

按母曰女樞以下皆宋書符瑞志之文

元年帝即位居濮

十三年初作歷象

二十一年作承雲之樂

三十年帝產伯鯨居天穆之陽

按山海經大荒西經引竹書帝產伯鯨下有是爲若陽四字而今本無之

七十八年帝陟○術器作亂辛侯滅之

帝嚳高辛氏

生而駢齒有聖德初封辛侯代高陽氏王天下使鼓人拊鞀鼓擊鐘磬鳳凰鼓翼而舞

按生而駢齒以下皆宋書符瑞志之文

元年帝即位居亳

十六年帝使重帥師滅有鄩

四十五年帝錫唐侯命

六十三年帝陟

帝子摯立九年而廢

帝堯陶唐氏

母曰慶都生於斗維之野常有黃雲覆護其上及長觀

于三河常有龍隨之一旦龍負圖而至其文要曰亦受
天祐眉八彩鬢髮長七尺二寸面銳上豐下足履翼宿
既而陰風四合赤龍感之孕十四月而生堯於丹陵其
狀如圖及長身長十尺有聖德封於唐夢攀天而上高
辛氏衰天下歸之

按母曰慶都以下皆宋書符瑞志之文

元年丙子帝即位居冀○命羲和歷象

五年初巡狩四岳

七年有麟

十二年初治兵

十六年渠搜氏來賓

十九年命共工治河

二十九年春樵僂氏來朝貢沒羽

四十二年景星見于冀

五十年帝遊于首山乘素車元駒

五十三年帝祭于洛

五十八年帝使后稷放帝子朱於丹水

六十胡景孟曰山海經海內南經帝丹朱葬於陰下郭注
引竹書云后稷放帝朱於丹水與此義符丹朱稱帝
者猶漢山陰公死加獻帝之謚也據此則似紀年本

作帝朱後人誤增爲帝子朱也若紀年本作帝子朱則景純不應爲此語

六十一年命崇伯鯀治河

六十九年黜崇伯鯀

七十年春正月帝使四岳錫虞舜命

帝在位七十年景星出翼鳳凰在庭朱草生嘉禾秀甘露潤醴泉出日月如合璧五星如聯珠厨中自生肉其薄如筴搖動則風生食物寒而不臭名曰筴脯又有草夾階而生月朔始生一夾月半而生十五莢十六日以後日落一莢及晦而盡月小則一莢焦而不落名曰冥

莢一曰歷莢洪水既平歸功於舜將以天下禪之乃潔齊修壇場於河洛擇良日率舜等升首山遵河渚有五老游焉蓋五星之精也相謂曰河圖將來告帝以期知我者重瞳黃姚五老因飛爲流星上入昴二月辛丑昧明禮備至於日昃榮光出河休氣四塞白雲起回風搖乃有龍馬銜甲赤文綠色緣壇而上吐甲圖而去甲似龜背廣九尺其圖以白玉爲檢赤玉爲泥似黃金約以青繩檢文曰闔色授帝舜言虞夏當授天命帝乃寫其言藏於東序後二年二月仲辛率羣臣沈璧于洛禮畢退俟至于下昃赤光起元龜負書而出背甲赤文成字

止於壇其書言當禪舜遂讓舜

言按帝在位七十年以下皆宋書符瑞志之文言虞夏

書下當授天命上尚有殷周秦漢四字

七十一年帝命二女嬪于舜

七十三年春正月舜受終于文祖

七十四年虞舜初巡狩四岳

七十五年司空禹治河

七十六年司空伐曹魏之戎克之

八十六年司空入觀費用元圭

八十七年初建十有二州

八十九年作游宮于陶

九十年帝游居于陶

九十七年司空巡十有二州

一百年帝陟于陶

帝子丹朱避舜于房陵舜讓不克朱遂封于房爲虞賓

三年舜即天子之位

按張守節史記正義於五帝本紀舜讓避丹朱於南

河之南下引竹書云昔堯德衰爲舜所囚也又引竹

書云舜囚堯復偃塞丹朱使不與父相見也其言不

似紀年本文又劉知幾史通疑古篇案汲冢瑣語云

竹書紀年 卷一
舜放堯於平陽瑣語自別一書而與紀年同出汲冢
並是竹書然未可以瑣語爲紀年也故晉書束皙傳
舉紀年與經傳大異之語不言此事

帝舜有虞氏

母曰握登見大虹意感而生舜於姚墟目重瞳子故名
重華龍顏大口黑色身長六尺一寸舜父母憎舜使其
塗廩自下焚之舜服鳥工衣服飛去又使浚井自上填
之以石舜服龍工衣自傍而出耕於歷夢眉長與髮等
遂登庸

按母曰握登以下皆宋書符瑞志之文

元年己未帝即位居冀○作大韶之樂

即帝位萁莢生於階鳳凰巢於庭擊石拊石以歌九韶
百獸率舞景星出于房地出乘黃之馬

按即帝位以下皆宋書符瑞志之文而無以歌九韶
四字

三年命臯陶作刑

九年西王母來朝

西王母之來朝獻白環玉玦

按獻白環玉玦亦符瑞志之文

十四年卿雲見命禹代虞事

在位十有四年奏鐘石笙管未罷而天大靄雨疾風登
屋拔木桴鼓播地鐘磬亂行舞人頓伏樂正狂走舜乃
擁璿持衡而笑曰明哉夫天下非一人之天下也亦乃
見于鐘石笙筦乎乃薦禹於天使行天子事于時和氣
普應慶雲興焉若烟非烟若雲非雲郁郁紛紛蕭索輪
囷百工相和而歌卿雲帝乃倡之曰慶雲爛兮禮縵縵
兮日月光華旦或旦兮羣臣咸進稽首曰明明上天爛
然星陳日月光華宏于一人帝乃再歌曰日月有常星
辰有行四時從經萬姓允誠於予論樂配天之靈遷于
聖賢莫不成聽饗乎鼓之軒乎舞之精華以竭褰裳去

之於是八風脩通慶雲叢聚螭龍奮迅於其藏蛟魚踴
躍於其淵龜鼈咸出其穴遷虞而事夏舜乃設壇於河
依堯故事至于下旻榮光休氣至黃龍負圖長三十二
尺廣九尺出于壇畔赤文綠錯其文言當禪禹

按在位十有四年以下皆宋書符瑞志之文

十五年帝命夏后有事于太室

十七年春二月入學初用萬

二十五年息慎氏來朝貢弓矢

二十九年帝命子義鈞封于商

三十年葬后盲于涓

竹書紀年卷一
三十二年帝命夏后總師遂陟方岳

三十三年春正月夏后受命于神宗遂復九州

三十五年帝命夏后征有苗有苗氏來朝

四十二年元都氏來朝貢寶玉

四十七年冬隕霜不殺草木

四十九年帝居于鳴條

五十年帝陟

義鈞封于商是謂商鈞后盲娥皇也鳴條有蒼梧之山

帝崩遂葬焉今海州

陳鳳石曰按元和郡縣志魏武定七年始置海州而

此註稱今海州是後人所益非約語也

帝禹夏后氏

母曰脩己出行見流星貫昴夢接意感既而吞神珠脩己背剖而生禹於石紐虎鼻口兩耳參鏤首戴鈎鈐胸有玉斗足文履已故名文命長有聖德長九尺九寸夢自洗於河以手取水飲之又有白狐九尾之瑞當堯之世舜舉之禹觀於河有長人白面魚身出曰吾河精也呼禹曰文命治水言訖授禹河圖言治水之事乃退入于淵禹治水既畢天錫元珪以告成功夏道將興草木暢茂青龍止于郊祝融之神降于崇山乃受舜禪即天

子之位洛出龜書是爲洪範三年喪畢都于陽城

按母曰脩已以下皆宋書符瑞志之文而無三年喪畢都於陽城二語今攷漢書地理志潁川陽翟下臣瓚曰世本禹都陽城汲郡古文亦云居之後漢書郡國志注亦云汲冢書禹都陽城則此二語當是紀年本文而誤繫於注下耳

元年壬子帝即位居冀○頒夏時于邦國

二年咎陶薨

五年巡狩會諸侯于塗山

南巡狩濟江中流有二黃龍負舟舟人皆懼禹笑曰吾

受命于天屈力以養人生性也死命也奚憂龍哉龍于是曳尾而逝

按南巡狩以下皆宋書符瑞志之文

八年春會諸侯于會稽殺防風氏○夏六月雨金于夏邑○秋八月帝陟于會稽禹立四十五年

禹薦益於天七年禹崩三年喪畢天下歸啓

帝啓

按羅泌路史夏后紀帝啓曰會下其子羅莘注曰見紀年是啓一名會今本紀年無之爲識於此

元年癸亥帝即位于夏邑大饗諸侯于鈞臺諸侯從帝歸

于冀都大饗諸侯于璿臺

二年費侯伯益出就國○王帥師伐有扈大戰于甘有扈在始

平鄂縣

六年伯益薨祠之

按晉書束皙傳謂竹書有益干啓位啓殺之二語其時竹書始出紀者當非謬增而今本無之反與經傳

合疑爲後人所刪

八年帝使孟涂如巴涖訟

十年帝巡狩舞九韶于大穆之野

按山海經大荒西經註夏后開舞九招也上經云天

穆之野是大當作天

十一年放王季子武觀于西河

武觀即五觀也觀國今頓邱衛縣

陳鳳石曰元和郡縣志隋煬帝時始置衛縣而此註稱今頓邱衛縣非約語也余按此註作小字雙行固自別於沈註且今本所註多出後人附益必非沈舊今但隨條辨正不欲刪之以滋疑耳

十五年武觀以西河叛彭伯壽帥師征西河武觀來歸

按路史羅莘注於既征西河下謂紀年在二十五年與今本不同

十六年陟

按路史啓在位十六年年九十一而羅莘注謂紀年啓二十九年年九十八更爲按以辨紀年之非而今本無之反與路史合又自元年癸亥至太康元年癸未合二十一年除三年喪畢即位亦當爲十八年均不可解

帝太康

元年癸未帝即位居斟鄩畋于洛表羿入居斟鄩

按路史羅莘注汲冢古文太康居斟尋乃失邦今本無下三字

胡景孟曰前漢書地理志北海平壽下臣瓚註引汲

郡古文云太康居斟尋與今本異余按斟本音斟

四年陟

帝仲康

元年己丑帝即位居斟鄩

五年秋九月庚戌朔日有食之命胤侯帥師征羲和

六年錫昆吾命作伯

七年陟○世子相出居商邱依邳侯

一作依同姓諸侯斟灌斟鄩

帝相

元年戊戌帝即位居商○征淮夷

二年征風及黃夷

胡景孟曰後漢書東夷傳註引紀年曰后相即位征黃夷無風及二字又所引紀年帝皆作后於義為優七年于夷來賓

八年寒浞殺羿使其子澆居過

九年相居于斟灌

十五年商侯相土作乘馬遂遷于商邱

二十年寒浞滅戈

二十六年寒浞使其子澆帥師滅斟灌

二十七年澆伐斟鄩大戰于濰覆其舟滅之

二十八年寒浞使其子澆弑帝后緡歸于有仍伯靡出奔

鬲

斟灌之墟是為帝邱后緡方娠逃出自竇歸于有仍伯

靡奔有鬲氏

夏世子少康生

丙寅年

少康自有仍奔虞

乙酉年

伯靡自鬲帥斟鄩斟灌之師以伐浞世子少康使女艾伐

過殺澆

甲辰年

○伯子杼帥師滅戈

伯靡殺寒浞少康自綸歸于夏邑

乙巳年

明年后緡生少康既長為仍牧正碁澆能戒之澆使椒求之將至仍少康逃奔有虞為之庖正以除其害虞思

於是妻之以二姚而邑諸綸有田一成有衆一旅能布其德而兆其謀以収夏衆撫其官職夏之遺臣伯靡自有鬲氏収二斟之燼以伐浞浞恃澆皆康娛日忘其惡而不爲備少康使女艾諜澆初浞娶純狐氏有子早死其婦曰女岐寡居澆強圍往至其戶陽有所求女岐爲之縫裳共舍而宿女艾夜使人襲斷其首乃女岐也澆既多力又善走艾乃田獵放犬逐獸因嗾澆顛隕乃斬澆以歸于少康於是夏衆滅浞奉少康歸于夏邑諸侯始聞之立爲天子祀夏配天不失舊物

帝少康

元年丙午帝即位諸侯來朝賓虞公

二年方夷來賓

三年復田稷

后稷之後不窟失官至是而復

十一年使商侯冥治河

十八年遷于原

二十一年陟

帝杼

元年己巳帝即位居原

五年自原遷于老邱

竹書紀年卷一
按路史羅莘注紀年帝子遷於老王或是字誤
八年征于東海及三壽得一狐九尾

按山海經海外東經註引汲郡竹書栢杼子征于東
海伯杼作栢杼又多一子字

十三年商侯冥死于河

十七年陟

杼或作帝宁一曰伯杼杼能帥禹者也故夏后氏報焉

帝芬

元年戊子帝即位

三年九夷來御

按後漢書東夷傳註引竹書作二年路史羅莘注

千方黃白赤元風陽凡九見竹書而今本但言九夷

來御胡景孟曰路史註千當作于疑合后相二年黃

夷七年于夷少康二年方夷后泄二十一年畎夷白

夷赤夷元夷風夷陽夷爲九

十六年洛伯用與河伯馮夷鬪

三十三年封昆吾氏子于有蘇

三十六年作園土

四十四年陟

芬或曰芬發東夷傳註引竹書作芬或曰芬發此合

按後漢書東夷傳註引竹書作后芬發與此合

帝芒

元年壬申帝即位以元珪賓于河

十三年冬狩于海獲大魚

三十三年商侯遷于殷

五十八年陟

芒或曰帝荒

帝泄

元年辛未帝即位

十二年殷侯子亥賓于有易有易殺而放之

按大荒東經王亥託於有易河伯僕牛下郭注云河

伯僕牛皆人姓名見汲郡竹書今本無之

十六年殷侯微以河伯之師伐有易殺其君綿臣

殷侯子亥賓于有易而淫焉有易之君綿臣殺而放之

故殷上甲微假師于河伯以伐有易滅之遂殺其君綿

臣中葉衰而上甲微復興故殷人報焉

按大荒東經郭註引此殷侯作殷王餘並同而無中

葉二語郭時不應有沈註則此亦當為竹書本文

二十一年命畎夷白夷元夷風夷口口黃夷

按後漢書東夷傳註引竹書作命畎夷白夷赤夷元

夷風夷陽夷路史羅莘注亦云畎白赤元風陽之六
夷也紀年云繇是服從則所闕二字當是赤夷黃當
作陽而又無繇是服從四字

二十五年陟

按路史羅莘注紀年作二十一與今本不同

帝不降

元年己亥帝即位

六年伐九苑

三十五年殷滅皮氏

五十九年遜位于弟局

按路史羅莘注紀年六十九與今本不同

帝局

元年戊戌帝即位

十年帝不降陟

三代之世內禪惟不降實有聖德

十八年陟

帝厘

一名胤甲

按路史帝厘子胤甲立羅莘注云見汲紀年作孔甲
是此為帝厘之子孔甲一名胤甲今本誤繫于此余

不欲易其行次故但為辨正之胡景孟曰海外東涇郭註引竹書胤甲即位居西河有妖孽十日並出今本此事在帝厘八年則胤甲似即帝厘或路史之誤否則此事本屬孔甲而輯竹書者誤繫於帝厘下也

元年己未帝即位居西河

四年作西音○昆吾氏遷于許

已姓名樊封于衛夏衰為伯遷于舊許

八年天有妖孽十日並出其年陟

帝孔甲

元年乙巳帝即位居西河○廢豕韋氏使劉累豢龍

三年王畋於蕢山

胡景孟曰夏本當作后而紀年並稱帝此又稱王不可解

五年作東音

七年劉累遷于魯陽

王好事鬼神肆行淫亂諸侯化之夏政始衰田于東陽蕢山天大風晦盲孔甲迷惑入于民室主人方乳或曰后來見良日也之子必大吉或又曰不勝也之子必有殃孔甲聞之曰以為余一人子夫誰殃之乃取其子以歸既長為斧所戕乃作破斧之歌是為東音劉累所畜龍一雌死潛醢以食夏后夏后饗之既而使求之懼而

遷于魯陽其後爲范氏

九年陟○殷侯復歸于商邱

按路史羅莘注紀年三十一與今本不同

帝昊

昊一作皐

元年庚辰帝即位○使豕韋氏復國

夏衰昆吾豕韋相繼爲伯

三年陟

帝發

一名后敬或曰發惠

元年乙酉帝即位○諸夷賓于王門冉保墉會于上池○

諸夷入舞

七年陟○泰山震

帝癸

一名桀

元年壬辰帝即位居斟鄩

三年築傾宮○毀容臺○畎夷入于岐以叛

六年岐踵戎來賓

十年五星錯行夜中星隕如雨○地震○伊洛竭

十一年會諸侯于仍有緡氏逃歸遂滅有緡

十三年遷于河南○初作輦

十四年扁帥師伐岷山一作山民

癸命扁伐山民山民女于桀二人曰琬曰琰后愛二人女無子焉斲其名于茗華之玉茗是琬華是琰而棄其元妃于洛陽妹喜於傾宮飾瑤臺居之

按路史羅莘注曰琬曰琰刻名茗華之玉見紀年雖約畧之辭然此亦當為竹書本文陳鳳石曰太平御覽帝王部帝桀妹喜下引竹書紀年有桀傾宮起瑤臺作瓊室立玉門十二字路史發揮關龍逢篇亦引之

十五年商侯履遷于亳成湯元年

十七年商使伊尹來朝

按路史炎帝紀下說伊尹事羅莘注引紀年交于末喜而遂間夏今本無之為識于此

二十年伊尹歸于商及汝鳩汝方會于北門

二十一年商師征有洛克之遂征荆荆降

二十二年商侯履來朝命囚履于夏臺

二十三年釋商侯履○諸侯遂賓于商

二十六年商滅温

二十八年昆吾氏伐商商會諸侯于景亳遂征韋商師取韋遂征顧○太史令終古出奔商

二十九年商師取顧○三日竝出○費伯昌出奔商○冬十月鑿山穿陵以通于河

三十年瞿山崩○殺其大夫關龍逢○商師征昆吾○冬聆隧災

三十一年商自陬征夏邑克昆吾大雷雨戰于鳴條夏師敗績桀出奔三朥商師征三朥戰于郟獲桀于焦門放之于南巢

按路史羅莘注紀年桀末年社圻裂而今本無此語

自禹至桀十七世有王與無王用歲四百七十一年起

子終
壬戌

按起壬子終壬戌止四百三十年而自舜十四年禹代虞事起算則當爲起壬申又按晉書束皙傳有紀年夏年多殷之語今夏數雖多商數雖少與經傳異而究不多於商亦不同也

殷商成湯

名履

湯有七名而九征放桀于南巢而還諸侯八譯而來者千八百國竒肱氏以車至乃同尊天乙履爲天子三讓遂即天子之位初高辛氏之世妃曰簡狄以春分元鳥至之日從帝祀郊禡與其妹浴于元邱之水有元鳥銜

卵而墜之五色甚好二人競取覆以玉篥簡狄先得而吞之遂孕胷剖而生契長爲堯司徒成功於民受封於商後十三世生主癸主癸之妃曰扶都見白氣貫月意感以乙日生湯號天乙豐下銳上皙而有得句身而揚聲身長九尺臂有四肘是曰成湯湯在亳能修其德伊勢將應湯命夢乘船過日月之傍湯乃東至于洛觀帝堯之壇沈璧退立黃魚雙踴黑鳥隨魚止于壇化爲黑玉又有黑龜竝赤文成字言夏桀無道湯當代之禱机之神見于邳山有神牽白狼銜鉤而入商朝金德將盛銀自山溢湯將奉天命放桀夢及天而舐之遂有天下

商人後改天下之號曰殷

按路史羅莘注湯七年九征雖不云出紀年而此言有七名而九征名字或有誤也又按自高辛氏之世妃以下皆宋書符瑞志之文

十八年癸亥王即位居亳○始屋夏社

十九年大旱○氏羌來貢

二十年大旱○夏桀卒于亭山禁弦歌舞

二十一年大旱○鑄金幣

二十二年大旱

二十三年大旱

二十四年大旱王禱于桑林雨

二十五年作大濩樂○初巡狩定獻令

二十七年遷九鼎于商邑

二十九年陟

外丙

名勝

元年乙亥即位居亳命卿士伊尹

二年陟

仲壬

名庸

元年丁丑王即位居亳命卿士伊尹

四年陟

太甲

名至

元年辛巳王即位居亳命卿士伊尹放太甲于桐乃自立

約按伊尹自立蓋誤以攝政爲真爾

按書咸有一德篇正義引紀年命字作其又多伊尹即位等字與左傳後序同

七年王潜出自桐殺伊尹天大霧三日乃立其子伊陟伊

奮命復其父之田宅而中分之

約按此文與前後不類蓋後世所益

按晉書束皙傳謂竹書有太甲殺伊尹與經傳大異又杜預左傳後序全載此文陸士衡豪士賦序伊生抱明允以嬰戮然則此自是竹書原文非後人所益也

十年大饗于太廟○初祀方明

十二年陟

沃丁

名絢

元年癸巳王即位居亳命卿士咎單

八年祠保衡

十九年陟

小庚約按史記作太庚

名辨

元年壬子王即位居亳

五年陟

小甲

名高

元年丁巳王即位居亳

十七年陟

雍已

名佃

元年甲戌王即位居亳

十二年陟

太戊

名密

元年丙戌王即位居亳命卿士伊陟臣扈

七年有桑穀生于朝

十一年命巫咸禱于山川

二十六年西戎來賓王使王孟聘西戎

三十一年命費侯中衍為車正

三十五年作寅車

四十六年大有年

五十八年城蒲姑

六十一年東九夷來賓

七十五年陟

太戊遇祥桑側身脩行三年之後遠方慕明德重譯而

至者七十六國商道復興廟為太宗史記作中宗

仲丁

名莊

元年辛丑即位自亳遷于囂于河上

六年征藍夷

九年陟

外壬

名發

元年庚戌王即位居囂○邳人姚人叛

十年陟

河亶甲

名整

元年庚申王即位自囂遷于相

三年彭伯克邳

四年征藍夷

五年佻人入于班方彭伯韋伯伐班方佻人來賓

九年陟

祖乙

名滕

元年己巳王即位自相遷于耿命彭伯韋伯

二年圮于耿自耿遷于庇

三年命卿士巫賢

八年城庇

十五年命邠侯高圉

十九年陟

祖乙之世商道復興廟為中宗

史記與無逸皆無之

祖辛

名旦

元年戊子王即位居庇

十四年陟

開甲

史記作沃甲

名踰

元年壬寅王即位居庇

五年陟

祖丁

名新

元年丁未王即位居庇

九年陟

南庚

名更

元年丙辰王即位居庇

三年遷于奄

六年陟

陽甲一名和甲

名和

元年壬戌王即位居奄

三年西征丹山戎

按山海經大荒北經郭注引竹書和甲西征得一丹

山語與此不同

四年陟

盤庚

名旬

元年丙寅王即位居奄

七年應侯來朝

十四年自奄遷于北蒙曰殷

按酈道元水經洹水注洹水出山連逕殷墟北竹書

紀年曰盤庚即位自奄遷於此遂曰殷遷於此之語

當非竹書本文然不應遺北蒙字而前後經注中亦

絕無北蒙地名恐蒙字為遂字之誤也胡景孟曰尚

書盤庚序正義引汲冢古文云盤庚自奄遷於殷語

與此小異又引束皙之說而從而駁之蓋束謂殷在

河北孔謂殷在河南意不同也然束引項羽傳云洹

水南殷墟上今安陽西有殷與道元合則當以束說
為是尊意謂蒙字為遂字之誤誠然余更意北字上
當有河字也

十五年營殷邑

十九年命邠侯亞圉

二十八年陟

小辛

名頌

元年甲午王即位居殷

三年陟

小乙

名斂

元年丁酉王即位居殷

六年命世子武丁居于河學于甘盤

十年陟

武丁

名昭

元年丁未王即位居殷命卿士甘盤

三年夢求傳說得之

六年命卿士傳說視學養老

十二年報祀上甲微

二十五年王子孝已卒于野

二十九年彤祭太廟有雉來

三十二年伐鬼方次于荆

三十四年王師克鬼方氏羗來賓

四十三年王師滅大彭

五十年征豕韋克之

五十九年陟

王殷之大仁也力行王道不敢荒寧嘉靖殷邦至于大
小無時或怨是時輿地東不過江黃西不過氏羗南不

過荆蠻北不過朔方而頌聲作禮廢而復起廟號高宗

祖庚

名曜

元年丙午即位居殷作高宗之訓

十一年陟

祖甲國語作帝甲

名載

元年丁巳王即位居殷

十二年征西戎○冬王返自西戎祖甲西征得一丹山

按大荒北經郭注所引乃和甲西征且是竹書本文

不當作小字註觀竹書者見其遺落欲補之又未之
審視而誤為祖甲因繫於此後人又誤以為註而刻
此下耳

十三年西戎來賓命邠侯組紺

二十四年重作湯刑

二十七年命王子囂王子良

三十三年陟

王舊在野及即位知小人之依能保惠庶民不侮鰥寡
迨其末也繁刑以攜遠殷道復衰國語曰元王勤商十
有四世帝甲亂之七
世而
隕

馮辛

史記作
廩辛

名先

元年庚寅王即位居殷

四年陟

庚丁

名囂

元年甲午王即位居殷

八年陟

本

武乙

名瞿

元年壬寅王即位居殷邠遷于岐周

三年自殷遷于河北○命周公奭父賜以岐邑

按殷本紀正義引紀年自盤庚徙殷至紂之滅二百

七十三年更不徙都而今本無之乃有此自殷遷於

河北下十五年又遷沫文丁元年又有居殷之語余

意殷本在河北當以史正義所引者為是而此為非

且此書盤庚徙殷在己卯至紂之滅在庚寅二百五

十二年亦與史正義所引不同也

十五年自河北遷于沫

二十一年周公奭父薨

二十四年周師伐程戰于畢克之

三十年周師伐義渠乃獲其君以歸

三十四年周公季歷來朝王賜地三十里玉十穀馬十匹

三十五年周公季歷伐西落鬼戎○王畋于河渭大雷震

死

按後漢書西羌傳注引竹書云王季伐西落鬼戎俘

二十翟平今本無下五字

文丁史記作太丁非

名托

按後漢書西羌傳註三引竹書並作太丁似竹書本

作太丁

元年丁丑王即位居殷自沫歸殷邑

二年周公季歷伐燕京之戎敗績

按西羌傳註引此作周師大敗

三年洹水一日三絕

四年周公季歷伐余無之戎克之命為牧師

按西羌傳註引此作命為殷牧師文選典引注亦引

此作命為殷牧師多一殷字

五年周作程邑

七年周公季歷伐始呼之戎克之

十一年周公季歷伐翳徒之戎獲其三大夫來獻捷王殺季歷

按西羌傳註引此作捷其三大夫語意未穩恐後漢書註誤

王嘉季歷之功錫之圭瓚秬鬯九命為伯既而執諸塞

庫季歷困而死因謂文丁殺季歷執王季於塞庫羈文王於玉門鬱尼之情

辭以作歌其傳久矣

十二年周文王元年有鳳集於岐山

十三年陟

帝乙

名羨

元年庚寅王即位居殷

三年王命南仲西拘昆夷城朔方○夏六月周地震

九年陟

帝辛

名受

即紂也
曰受辛

元年己亥王即位居殷命九侯周侯邾侯

周侯為
西伯昌

三年有雀生鷓

四年大蒐于黎○作炮烙之刑

五年夏築南單之臺兩土于亳

六年西伯初禱于畢

九年王師伐有蘇獲妘己以歸○作瓊室立玉門

按作瓊室立玉門太平御覽及路史關龍逢篇引作

桀事胡景孟曰文選吳都賦劉淵林註引汲郡地中

古文冊書曰桀築傾宮飾瑤臺紂作瓊室立玉門據

此則紀年自是分屬而御覽路史云云不可解

十年夏六月王畋于西郊

十七年西伯伐翟○冬王遊於淇

二十一年春正月諸侯朝周○伯夷叔齊自孤竹歸于周

二十二年冬大蒐于渭

二十三年囚西伯于羑里

二十九年釋西伯諸侯逆西伯歸于程

三十年春三月西伯率諸侯入貢

三十一年西伯治兵于畢得呂尚以為師

三十二年五星聚于房○有赤鳥集于周社○密人侵阮

西伯帥師伐密

三十三年密人降于周師遂遷于程○王錫命西伯得專

征伐

約按文王受命九年大統未集蓋得專征伐受命自此

年始

三十四年周師取耆及邠遂伐崇崇人降○冬十二月昆

夷侵周

三十五年周大饑西伯自程遷于豐

三十六年春正月諸侯朝于周遂伐昆夷○西伯使世子

發營鎬

三十七年周作辟雍

三十九年大夫辛甲出奔周

四十年周作靈臺○王使膠鬲求玉于周

四十一年春三月西伯昌薨周文王葬畢畢西於豐三十里

四十二年周武王元年西伯發受丹書于呂尚○有女子化為

丈夫

按下文武王元年己卯則當在四十一年而誤繫於此

四十三年春大閱○嶢山崩

四十四年西伯發伐黎

四十七年內史向擊出奔周

四十八年夷羊見○二日竝出

五十一年冬十一月戊子周師渡盟津而還○王囚箕子

殺王子比干微子出奔

五十二年庚寅周始伐殷○秋周師次于鮮原○冬十有

二月周師有事于上帝庸蜀羌髡微盧彭濮從周師伐殷

伐殷至邢邱更名邢邱曰懷

湯滅夏以至於受二十九王用歲四百九十六年起癸亥終

庚寅

按起癸亥終庚寅則為五百零七年當是起癸亥終

武王元年己卯耳司馬貞史記索隱引徐廣曰從禹


至桀十七君十四世汲冢古文曰有王與無王用歲

四百七十一年文選六代論注亦引此曰夏自禹以

至於桀十七王殷自湯滅夏以至於紂二十九王則

夏紀年之末一行及此行皆當為紀年本文非沈注

也但據本書商當爲三十王而諸書所引並爲二十
九王爲不同而旁注起壬子終壬戌起癸亥終庚寅
乃近代校竹書者不細心推算而誤注之耳



程